


www.diarioaruba.com
The way business moves!
DIARIO
Online
 E Matutino di Aruba

TA ASINA Y AWOR MI TA REGLA CUENTA CU BO

Dialuna tabata net un luna cu a pasa y cu Munye Oduber - Winklaar tabata sinta mi dilanti y nos a **"bati bleki"**, **"hasi redo"**, **"papia riba hende"**, **"lepie"**, **"brongosa"** otro, **habraka otro cu palabra**, **"hari barica yen"** y despues di casi 3 ora termina cu nostalgia pa pasado. Nos a keda di regla cuenta durante otro bishita.

Munye a trece pa mi su buki **"Ta asina y awor mi ta regla cuenta cu bo"** y cu tin tambe e parti hulandes **"Zo reken ik nu met je af"**.

Mi a tuma dos anochi pa lesa e buki aki, y na final, mi a dicidi cu mi tin cu lese un biaha mas pa mi por goze mas ainda.

Mi a bolbe trabao cune, y despues, ata e buki a desaparece. Mi a bolter delaster un papel riba mi lessenaar cu parce un piramida di **"papius"**. Mi a saca latchinan di mi lessenaar mil biaha y listra milimeter pa milimeter.

Mi a saca delaster potoshi cu mi tin den cahanan bao di mi lessenaar, y pa nada por a haya e buki.

Aki diaranzon (siman pasa) a yega. Munye ta bay presenta su buki na VAWARP fin di siman y mi no a skirbi un letter riba e buki aki. Ki vergüenza!!

Suerte tabata cu Munye no a bin regla cuenta cu mi. Si mester a yega asina leu, mi sa cu lo tabata peor cu uso di su pen! E culto cu e ta como persona, a pone cu e no a busca drechi di esaki, ni reclama.

Diasabra anochi mi a dreña edificio di DIARIO y bay directamente na mi oficina. Atrobe mi a cuminza bolter tur cos, y finalmente a keda sin mira e barbulete cu tin riba e buki kaft blauw. E barbulete a desaparece cu e buki.

Diadomingo mainta m'a sali di cas cu e buki den mi mente. Cada seconde tabata tin e zonido den mi mente: **"e buki, e buki e buki"**.

M'a cay sinta sin energia dilanti mi computer y keda mira e pantaya bashi pensando: **"unda e buki aki ta?"**

Ta e momento ey mi a ripara e ciego cu mi tabata di berdad un luna largo.

E buki tabata riba mi computer, mirando mi den cara tur dia y henter dia. Tur anochi cu mi tabata sinta den oficina. **"Ata mi 'kil'!"**

M'a listra rond di e computer, bao di computer riba mesa y den latchinan, y cahanan y ningun momento a tira bista riba e computer. M'a tuma diadomingo y dialuna anochi pa lesa e buki un biaha mas, y toch mi mester bisa cu mi tin cu lesa e buki aki pa di tres biaha y kizas mas biaha ainda.


ESTILO UNICO Y CU MUSICA

Mas o menos 30 aña pasa mi a lesa e buki **"Mi tata Polis"** di e autor curasoleño Yerba Seco (Hooi) y mi a keda encanta cu e estilo cu el a usa di un palabra, bao di dje, dos palabra, bao di dje, un palabra of dos palabra, y asina a sigui di comienzo te fin di e buki. Henter e storia tabata imprimi riba e parti mey mey di cada pagina.

E estilo aki mi a bin topa cune den e buki di Munye. Un storia den 11 capitulo distinto den cual mi no a mira Munye. Mi a mira cualquier mucha muher, cualquier dama, cualquier señora cu a describi su anhelonan, deseonan, felicidad, tristeza, sufrimento di su adolescencia pa su madurez.

Mi a mira e mucha muher teenager enamora, e muher adulto, e muher madura, bayendo back den su periodo di bida di mas **bunita** y den cual el a siña bira **"Muher"**.

Mi a pensa cu cualquier muher enamora, sea soltera of casa. lo



lesa e buki aki y bolbe lesa esaki y recorda e momentonan mas dushi di su bida, principalmente e momentonan cu e tabata enamora.



Bo ta lesa un poesia musical, un poesia lirico y na mes momento un storia, pero den un estilo unico cu ta ponebo admira e autor mas ainda.

E Papiamento bunita. E papiamento di nos grandinan y cu ta di nos ainda, cu su palabranan y biradananan criojo ta dunabo nostalgia na e Papiamento di ayera. E papiamento cu ta bayendo perdi cu e **"Papiaño!"** cu ta wordo papia henter dia na radio y cu por scucha na television y cu por lesa tambe awendia.

Munye a bolbe musta mi cu mi ta den kleuterschool ainda pa locual ta poesia. Mi ta gusta un poesia, mi ta gusta lesa poesia, y de vez en cuando mi ta skirbi un poesia "scondi" y toch mi no sa nada di poesia. Poesia ta un arte cu tanto estilo y pa mi usa e palabra **"poeta"** ta universidad di letra mi tin su sigui prome.

Mi no por defini poesia pasobra e ta mucho grandi pa mi.

Pesey mi ta admira nos skirbidornan di poesia masha hopi. Mi ta admira nan creatividad y nan don di pensamiento. Mi ta encanta cu poemanan cu mi por lesa y sigui manera riba notanan musical. **"Ta asina y awor mi ta regla cuenta cu bo"** ta un di nan.

E PARTINAN DI GOZO

Den e prome parti **"Demasiado largo"**, mi a cuminza busca caba ta na unda Munye ta bay, describiendo e temor di brongosa un of otro ser ker di amistad. El a bira despues pa **"E soñorealidad"** y ta hibabo riba Malecon unda el a topa su militar. Bo por sinti con su curazon tabata bati y cu e ta expresa: **"Amor - cu ta desperta. —Prome señal— di pasion kisas— cu mi a cuminza experiencia."** Di eynan a pasa pa e capitulo riba **"E barbulete"**. E parti aki mi a haya hopi bunita y e parti cu e ta describi e mucha muher di den **"leesboek"** cu e net den su man tras di un barbulete.

Munye a sorprende mi cu e parti di **"Bo wowo y idioma di curpa"** den cual el a mezcla partinan di palabranan di e cancion di Rudy Plaate **"Toch mi sa"**. Bo ta lesa topa cu e frasenan di e cancion, sigui lesa, pasa **"ta di bo mi ta"**— **"toch mi sa"** y termina cu **"ta imagina mi a imagina mi"**.

Di **"E diferencia"** bo ta sigui lesa pa **"E momento mas desea"**, yega na e capitulo di **"Envia"** cu despues di 12 pagina ta termina cu un expresion na ingles cu a ponemi hari di berdad. Esaki pasobra ningun momento mi a spera e palabranan, ni cu Munye lo usa nan, pero den e obra pa e final nan tabata indispensable y ta rima bon cu **"love you"**.

Asina mi a sigui lesa, te cu finalmente el a yega na muestra su prome amor cu: **"Bo a bira nubia— e biento— e shelo— cu tiernamente— ta carga mi— caricia mi. E pluma— te den —mas aya—."** **"Ta— asina— y— awor— mi— kier regla— cuenta— cu— bo."** Aki tur cos ta cuminza di nobo, pero na hulandes.

E ganador di Premio nobel di Literatura, Derek Walcott a yega di menciona cu : poesia ta un oracion.

Bo ta expresa den dje, loke bo ta haci den un oracion. Asina por tuma e obra aki. Munye den su imaginacion, papiando cu su mes recordando e pasado cu tur su placernan y dolornan, pero den e caso aki, poni riba papel pa nos goza di dje tambe.

Si mi tin tempo awe nochi, mi ta bolbe cuminza **"regla cuenta"** cu e buki aki.

Munye, masha pabien. **"Zo reken ik nu met je af"**.

Juby Naar